

O LE SULU SAMOA



EKALLESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839 O LE SULU SAMOA SETEMA 2024

email: sulusamoa@cccs.org.ws -Main Office: Ph. 24414, Ext 29 - website: www.cccs.org.ws

MAA FAAVAE FALE TELE O TINAI PAPAUTA



Susuga Tunumoso S. Iosia FT, Ta'ita'i Sauniga Maa Faavae Fale Tina.

OSI LE FEAGAIGA EFKS MUSUMUSU & SALIMU



Susuga Nuufaigata Mulipola FS & Lialia'i, le fanau & Aiga i le EFKS Musumusu, Fagaloa.

O LE FAASINO UPU

1. **O LE LAUGA.....2**
 2. **FAAIPOIPOGAI TUPA TUTUSA....4**
 3. **O LE PEROFETA MULIMULI.....9**
 4. **MAA FAAVAE FALE TINA...13**
 5. **180 TAUSAGA MALUA...13**
 6. **O LAU AFIGA O LE SULU I AAO...14**
 7. **OSIGA FEAGAIGA
EFKS MUSUMUSU...15**
 8. **TOE FAAMANATU FAAMOLEMOLE...16**
 9. **PI'ILUA LE ASO SA TALA LELEI
& ASO SA TAMA...16**
 10. **FAASA'OGA....16**
-

O LE LAUGA

Tusi Faitau: Galuega 3:1-10.

Matua: Galuega 3:2, “*Ua ave fo’i le tasi tagata ua pipili talu ina fanau mai, ua tu’uina atu o ia e i latou i aso fai so’o i le faitoto’a o le malumalu ua igoa i le Matagofie, e fa’atoga atu i se meaalofo i ē ulu atu i le malumalu.*”

Manatu autū: O le fesili. O moni le tatou o mai i le Fale o le Atua? (Are we honest when we come to the House of the Lord?)

Fa’atomuaga:

Fai mai a pō’ia tino i ma’i, ona tatou o lea i falema’i e sa’ili togafiti i foma’i. A leaga a tatou ta’avale, ona tatou o lea i le Fale inisinia. A naunau i le poto salalau, o le falea’oga o lo’o i ai faia’oga o lo latou matāfaioi lea, o le a’oa’oina o alo ma fanau. A e fia malamalama i au tū ma aga i fanua, o le fale lava o matai o lou falea’oga lava lea. O le mafutaga fiafia ma se mafutaga ia maua se fealoafani, o totonu lava o aiga e te maua i ai. A e a mama’i o tatou agaga, ma tauau ina manumalo le fili ma le ti’apolo ia i tatou, fai mai o le fale o le Ali’i, e utuvai ai le agaga o lo’o gālala i le fia taumafa i le vai o le ola.

Atonu o lenā ua nofo fale i aai o outou finagalo le uiga o le fa’atomuaga; le naunauta’iga i le fa’amatalaina o le tāua o lea fale ma lea ituaiga fale. Auā o le nofoaga lava ma le mea e tupu ai. Ta’atia ia isi mau fale lea sa tomalaulauina atu. A o le Fale Tapua’i o le Alii, o moni ea le tatou o

mai i ai? Are we honest with ourselves, when we come to the house of the Lord?

Tusi Faitau (Exegete)

E tāua ona tatou silasila toto’a i le mafua’aga ma le faamoemoe lea tatou te o ai i le fale o le Alii. Fai mai la tatou matua, “*Ua ave foi le tasi tagata ua pipili talu ina fanau mai, ua tuuina atu o ia e i latou i aso fai soo i le faitotoa o le malumalu ua igoa i le Matagofie, e faatoga atu i se meaalofo i ē ulu atu i le malumalu.*” E matuā fesiligia lava le faamoemoe ma le aiga o le ulufale atu o i latou nei i le fale o le Ali’i. O le tala lea sa tatou faitauina o lo’o fa’amatalaina ai gaioiga sa fa’atino e Peteru, a o aga’i atu e ulufale i le Fale o le Ali’i. O le upu moni, fa’afetai ia Peteru ma le agaalofo na vave ai ona mapu lenei tagata puapuagatia. Auā talofa e, i le umi na pologa ai lenei pipili.

Talofa e, i lana augani i le fia ‘ai ma le fia inu, a e ua leai lava sē tasi e loto atu e fesoasoani. Aisea? O le natura masani lea o le tagata; e fa’amasino muamua, e faitio, e a’amu, e va’ai maulalo. A o nei mea uma e mafua mai ona o le matape’ape’a. A o le natura lea fa’aletagata e maua ai fo’i tatou.

I le fuaiupu lea ua fai nei ma tatou matua, a tatou mafaufau loloto lava i ai, ma tu’u o tatou tagata i totonu o lenei tala, ona sa’o lea o mafaufauga o le asō - O moni ea le tatou o i le Fale o le Ali’i? O le tala’aga o lenei tagata pipili, e 40 tausaga o fesi’ita’i solo i lea nofoaga ma lea nofoaga. Ma ua o’o lava i fafo atu i le faitoto’a o le malumalu ta’ua o le ‘Matagofie’. O le mafua’aga, e aisi ma fa’atoga ai mo ni meaalofo.

A silasila lā i ē na faatoga ma aisi i ai lenei pipili, o tagata o loo ulufale i totonu o le Fale o le Ali’i. Na augani, na sāili, na faatalitali lava pe i ai lava sē tasi o le a tali atu i lana aisiga. A e pagā lea, e 40 tausaga, e leai lava sē tasi. Ona tupu ai lea o se fesili e fai ma fa’atupu manatu: O le ā ea le faamoemoe ia te oe ma au i lo tā ulufale atu i le fale o le Ali’i?

E sa’o ai le fetalaiga a Iesu, “*E leai se mea o lo’o i fafo o le tagata e alu ane i totonu ia te ia*

e mafai ona leaga ai o ia; a o mea e sau mai totonu ia te ia, o mea ia e leaga ai le tagata.” Afai na ulu atu i latou nei, i le fale o le Alii i le fa’amoemoe, e faatino le taulaga mo le Alii, o ai lā le Alii? O le ā le natura ua lauiloa ai lo tatou Ali’i? E le o le Alofa ea? O fea o i ai le tautinoga a le Kerisiano ma lē o loo mulimuli ia Iesu? Aisea ua nā ona fa’aali ma faailoa mai ai e le tusitala, na o le ulu atu ā i totonu o le malumalu, a e le o i ai se fa’amatalaga pe na fesoasoani, pe na alofa i le pipili?

O lagona o le tagata e fafau mai i totonu o le loto, e afua ai le moni ma le faamaoni o le ulufale i le fale o le Alii. O le fesili lā, O atagia lā le moni o loto o i latou nei na ulufale i le fale o le Ali’i? E aogā lenei tala, e lu’iina ai tatou le au Kerisiano; i le mafuaaga e ala ai ona tatou o i le Fale o le Ali’i. E a’oa’oina ma fa’amalosi’au i tatou, ina ia fa’atino le uiga o le alofa tunoa o le Ali’i, le alofa fai mai e alofa atu ma alofa mai. Fa’amoemoega lea o le Fale o le Ali’i. E le o se fale e su’e ai tala o tagata. Po o se fale fa’amasino tatou te fa’amasino atu ai. O le Fale o le Alii o loo ta’ui ai le silisili ese ma le mamalu o le Alii. Le alofa matalasi lenā o le Alii. O le a se aga sa tatau na fa’alia ma fa’atino ia i latou na ulu atu i totonu o le malumalu; pagā lea ua le o lea se va’aiga ma le naunauta’iga.

Faatatau:

Manatu, o le a se feau tāua mo i tatou? Toe seu silasila i le afuaga o le tatou o ai i le fale o le Alii. O le fale e a’oa’oina ai tatou i le uiga o le alofa o le Alii. O le fale e a’oaina ai tatou i le tāua o le loto faamagalō. O le fale e utuvai ai loto ma agaga o loo gālala i le vai o le ola. Le fale e fa’alototeleina ai ma fa’amalosi’au ai tatou, pe a o’o ina mou atu le fa’amoemoe ma le ola fa’atuatua. O le faamoemoega lenā o le fale o le Alii.

E le o se fale tatou te o mai ai, e tuu ifo ai le isi o tā uso ia Keriso i lalo. E le o se fale fo’i tatou te o mai ai e taumuimui ai, pe tasu’e atu ai tala e fa’aleaga ai le isi uso, le tuafafine, le tuagane, le uō, le tamā po o le tinā. E le o se fale tatou te o mai e faitio ma fa’amasino atu. E le o se fale fo’i tatou te o mai ai e momoe ai.

A o le fale o le Ali’i, e tapu’e ai le ola fa’aleagaga o le tagata. Le fale na fau mo le fa’amoemoe, ia potopoto ma mafuta ai fanau a le Atua, ma tapua’i i le moni ma le fa’amaoni ia te Ia. Moomia lā lo tatou faatāuaina le auga o le Fale o le Ali’i. O nei vai tau ua tauau ina mumusu tagata e o i le Fale o le Alii. Aisea? O isi ā, e sola le loto fia tapua’i, ona o le mafuaaga o loo o mai ai isi i le fale o le Alii. Afai ua fai le falema’i mo ē mama’i i lā le tino, o lona uiga, na fai le FALE O LE ALII mo ē o loo mama’i i lā le faatuatua. If hospitals were built for those who are sick and injured, then that means the House of the Lord was built for those who are sick in Spirit and the Soul. The purpose and the significance of God’s house, is for us to learn the true meaning of love and forgiveness.

Aua ne’i galo ia i tatou le sini autū na afio mai ai le Alii, e le’i sau mo ē mālōlosi, e le’i sau mo ē maumea, e le’i sau mo ē mau’oa; e le’i sau fo’i mo ē ua amiotonu. Leai! Na afio mai le Ali’i, mo ē agasala, mo ē mātitiva, mo ē mama’i i la le agaga. E pei o le pipili lea sa mau i luma o le fale o le Ali’i. O le lu’i mo i tatou, a maua e i tatou le avanoa e fa’atino ai le galuega alofa, e pei ona a’oa’oina tatou i totonu o le FALE O LE ALI’I, ‘AUA LE TAOFIA I TATOU...Ia fai ma vi’iga i le Ali’i. Na tō’atama’i le Ali’i o Iesu Keriso, ina ua ulu atu i le FALE O LONA TAMĀ, talofa ē, ua latou lē fa’aaogaina ma le tatau, e tusa ai ma le faamoemoe na fausia ai.

Upu Faai’u:

Tatou faatāua le Fale o le Alii. Tatou ola i le mafuaaga ma le fa’amoemoe o le Fale o le Ali’i. O le Ali’i o le alofa lava o ia. Na o mea lelei lava e tatau ona fua mai ai. O le FALE na sa’afi ai le FaiSalamo ma fa’apea mai, “*Na ou fiafia ina ua latou fa’apea mai, tatou te o i le Fale o le Alii.*” A e ala ona lē lelei le Fale o le Alii, ina ua tatou filifili, i le lē faatino ma le moni ma le faamaoni aoaoga ma fa’amoemoega o le FALE O LE ALI’I. O le fesili e lu’iina ai tatou; O moni le tatou o mai i le Fale o le Alii? Are we honest when we come to the house of the Lord?

Ona o Iesu Amene.

Saunia susuga Tau Toleafoa FS,
EFKS Falefa,
Pulega Anoama’a
Matagaluega APIA I SASA’E.

O LE TUSI PAIA ma FAAIPOIPOGA ITUPĀ TUTUSA

(Pepa Mafutaga Matagaluega Vaimauga 2024

(Saunia susuga Dr. Arthur Wulf FS, MTC)

Faatomuaga.

Ou te talitonu ua manino i le autū ua atofaina mo lenei Pepa le faamoemoe o le tautalaga. O le fia folasia lea o nai motugaafa mai le Tusi Paia e faatautu i le mataupu o faaipoipoga i le va o le alii ma le alii, faapea le va o le tamaitai ma le isi tamaitai. O lenei mataupu o le tasi lea o luitau o lenei talutalu fou ua aafia ai le Ekalesia, ma e le o maoti ai se tali a le tatou Ekalesia EFKS. O le faamoemoe maualuga la o lenei Pepa, o le faailoa atu lea o nisi Tusi mai le Tusi Paia ma o latou faauigaina e faatautu i faaipoipoga itupā tutusa, faapea talitonuga faamataupu silisili o le tatou Ekalesia, e faufau ai so outou finagalo ma so tatou manatu, auā se tali maumaututū a le tatou Ekalesia i lenei mataupu.

Talaaga o Faaipoipoga Itupā Tutusa.

E lē fou nei faaipoipoga a itupā tutusa pe a vaavaai i le tala faasolopito o le lalolagi. Na alia'e i atunuu faapaupau i Eleni, Roma, Mesopotamia, o le atu Europa, ma nisi vaega o Saina anamua. Mo ni nai faataitaiga i le malo o Eleni na sasao faaafi ai faigapaaga ma faaipoipoga itupa tutusa i le vaiata 500 – 300 TLM (Tausaga Lumanai Mesia). O loo i ai faamaumauga o lo latou tupu tautaua o Alesana le Sili, na faaipoipo atu i le alii o Apaesetia (Hephaestion) ma Pagoa (Bagoas) mulimuli ane. O le lape lea o Alesana le Sili auā na maliu e leai sona suli e faauau lana nofoaiga, ma avea ma mea na femisa'i ai ona taitai au ma malepe ai lona malo.

E faapena foi le malo Roma, na tatala lava faaipoipoga itupa tutusa mai le 27 TLM seia oo ina avea ma malo Kerisiano i lalo o le taitaiga a le Emeperoa o Kositatino i le 324 TTM (Tausaga Tuanai Mesia).

O le Emeperoa o Roma e suafa ia Nero (37-68 TLM), na iloga i le sauaina o le au Kerisiano ma o loo faamauina na i ai lana au tau nonofo, e aofia ai alii e toalua. O lana faaipoipoga itupa tutusa muamua na faaipoipo atu ai i le alii o Pifakora (Pythagoras) lea na avea ai Nero ma tamaitai i le la ulugalii. Mulimuli ane na ia toe faaipoipo atu i le alii talavou o Sipora (Sporas) lea na fai ma tamaitai i le la ulugalii ma le emeperoa. E tusa ai ma molimau o le faaipoipoga, o se faaipoipoga tele ma na faailoga e le malo atoa, i faiga'ai ma fiafia. O le faailoga o le talia lautele o faaipoipoga itupa tutusa e tagata nuu Roma i lena vaiata.

A o ia faiga na suia ina ua tulai mai le Emeperoa o Kositatino, ma ia talia ai le Ekalesia Kerisiano e avea ma tapuaiga a le malo Roma. Lea na faia ai le tulafono e sala oti le alii e faaipoipo atu i le isi alii, faapena foi i tamaitai faaipoipo i isi tamaitai. O le tulafono lea na lima taitaiina ai foi ma malo i lalo o puleaga a Roma ma sosolo atu ai i isi atunuu o Europa ma le lalolagi atoa. O le naunautaiga lea na ala ai ona tatanu faaipoipoga itupa tutusa seia oo mai i lenei talutalu fou.

A e lē aofia ai nai faaipoipoga na faia faalilolilo. E i ai le faaipoipoga a le tamaitai o Arabella Hunt ma le tamaitai o Amy Poulter i Lonetona i le tausaga 1680. Na teu faatama le tamaitai o Amy ma mafai ai ona faaipoipo i le Ekalesia Egelani. E faapena foi i le tamaitai o Anne Lister ma le tamaitai o Ann Walker, na faia faalilolilo foi le faaipoipoga i le aai o York i Egelani i le tausaga 1834. O nei faaipoipoga e ui e le'i taliaina faaletulafono, a e na faapena lava ona talia nei tamaitai e le sosaiete o faafatama ma faafafine, o ni ulugalii. A o nai faataitaiga ia o le i ai pea o faaipoipoga itupa tutusa i le tala faasolopito o le lalolagi i le vaiata na tatanu ai ia ituaiga faaipoipoga ma teena faaletulafono.

I le 1979, na fausia ai ma talia e Malo Aafaatasi le CEDAW o le Feagaiga Faavaomalo e Tafieseai ai Faiga Faailoga Tagata faasaga i Tina. I lalo o le vaega 16 o lenei Feagaiga, o loo uuna'ia ai aiā tatau a tagata uma i ituaiga faaipoipoga e manao i ai; o le faaipoipoga i le va o le alii ma le tamaitai, po o se faaipoipoga itupa tutusa i le va o le alii ma le isi alii, po o le va o le tasi tamaitai ma se isi tamaitai.

O taumafaiga la a atunuu a i totonu o le Malo Aafaatasi e usitaia faiga faavae o le CEDAW, lea na toe lalaga mai ai loa le taliaina faaletulafono o faaipoipoga itupa tutusa. Na umi se taimi na soalaupule ai Malo taitasi, ma o le tausaga 2000 na talia faaletulafono ai e Holani (o le atunuu muamua foi lea), o faaipoipoga itupa tutusa ma faatino ai le uluai faaipoipoga itupa tutusa i le 2001. I le taimi nei 2024, ua sili atu i le 30 atunuu e aofia ai Niu Sila ma Ausetalia ua taliaina ma faatulafonoina faaipoipoga itupa tutusa. Faaopopo i ai ma le isi 12 atunuu o loo talia faaletulafono ai le lesitaraina o faiga paaga itupa tutusa.

I le faatinoina ai la o nei faaipoipoga i nisi o atunuu o loo faapena ona talia ma aofia ai nisi o Ekalesia Kerisiano. Mo nai faataitaiga i Amerika, ua talia ma faatinoina e le United Church of Christ faaipoipoga itupa tutusa ma ua faapena foi ona ave le faitalia i o latou faifeau pe latou te teena pe talia le faatinoina o ia faaipoipoga. E faapena foi le United Church of Canada ua latou taliaina ma faatinoina foi faaipoipoga itupa tutusa. A e o loo faapena ona ave le faitalia i le faifeau ma le aulotu pe latou te faia ai faaipoipoga itupa tutusa pe leai. E faapena foi le Ekalesia Metotisi a Niu Sila. Ua latou taliaina foi le faatinoina e o latou faifeau ma aulotu o faaipoipoga itupa tutusa. A e o loo i ai foi le aiā tatau a le faifeau ma le aulotu latou te teena ai le faatinoina o ia ituaiga faaipoipoga.

E tusa ai la ma le tulaga ua i ai nei faaipoipoga itupa tutusa i le lalolagi faapea le Ekalesia, ua tupu ai le fesili: Po o le a se vaai a le Tusi Paia i nei ituaiga faaipoipoga? Po o le mea ea, e i ai se faavae faaleTusi Paia o nei ituaiga faaipoipoga ua faataga ai e nisi Ekalesia? Ia a o le a se talitonuga faamataupu silisili a le tatou Ekalesia EFKS?

EFKS ma Faaipoipoga Itupa Tutusa

A silasila i le Mataupu Silisili o le Faavae Faaleagaga o le LMS (1957, Reprinted 1995), o loo faamatala ai le faaipoipoga faakerisiano e faapea (**Vaega 20, itulau 11-12**):

20. Christian Marriage

We believe that **Christian Marriage is a covenant made among a man, a woman and God**, which is witnessed by the Church and which is sealed by the Holy Spirit. **Therefore, it is fitting that both the man and the woman should be Church members**, and that the Covenant should be made in the **presence of the Congregation of which they are to be a part when they are married**.

We believe that the Christian married state is blessed by God for the **continuance of mankind** and for the joy of mankind. It is contrary of God's will that any man have more than one wife at the same time, or for any woman to have more than one husband at the same time. Therefore in Christian Marriage,

20. Faaipoipoga Faa Kerisiano

Tatou te talitonu, o le **Faaipoipoga faaKerisiano o le Feagaiga lea ua osia i le va o le tane, le fafine ma le Atua**, ua moli-mauina e le Ekalesia, ma ua faamaufaailogaina e le Agaga Paia. **O le mea lea ua tatau ai lava i le tane atoa ma le fafine ona ia avea ma tagata o le Ekalesia, ma e ao ina osia lena Feagaiga i luma o le Aulotu la te au faatasi ai ina ua faaipoipoina i laua.**

Tatou te talitonu o e ua faaipoipoina faaKerisiano, ua faamanuiaiina e le Atua **mo le faatupuina pea o tagata** atoa ma le olioli o le mafutaga o tagata. E lē tusa ma le finagalo o le Atua se tane ua sili atu i le toatasi le avā i le taimi e tasi, po o se fafine e sili atu i le toatasi le tane i le taimi e tasi.

man and woman covenant to love each other, to comfort each other, to respect and support each other as long as both shall live. Wherefore, Christian Marriage ought to be entered into reverently, advisedly and in the fear of God.

It is conceivable that persistent sinning without repentance may break the bond of Christian Marriage. We believe that in this case, the pastor who would conduct the service must exercise his discretion whether or not to re-marry an innocent, or a completely repentant person who has received a divorce certificate, in order that this person may have another opportunity of building a Christian home within the Church.

atu i le toatasi le tane i le taimi e tasi. O le mea lea ua osifeagaiga ai le tane ma le fafine i le Faaipoipoga faaKerisiano, ina ia fealofani, ia fefaamafanafana'i, ia fefa'aalooaloa'i ma ia fetausia'i ai, i le ma'i poo le malolo, ma ia felagolagoma'i pea i la'ua i aso uma lava la te ola ai. O le mea lava foi lea, e tatau ona ulu atu ai i le Faaipoipoga FaaKerisiano ma le ava atoa ma le mata'u i le Atua.

E matua mata'ituina lava ona o le tu'itanau pea i le agasala e aunoa ma le salamo ona faamalepeina ai le Feagaiga o le Faaipoipoga faaKerisiano. Ua tatou talitonu ai, o se mataupu faapena e mafai ai i le faifeau na ia taitai le sauniga, ona faia e ia lava le faatatau tonu, pe tatau pe leai ona toe faaipoipo le tagata mama po o le tagata ua salamo faamaoni ua na maua se tusi alei, ina ia mafai i lea tagata ona maua se isi avanoa e ati a'e ai se aiga faaKerisiano i totonu o le Ekalesia.

O loo **valivali (highlight)** atu vaega e le tusa ai le faatinoga o se faaipoipoga itupa tutusa, ma le Mataupu Silisili o le Faavae Faaleagaga o le LMS (1957, Reprinted 1995).

(i) **O le Faaipoipoga FaaKerisiano o le faaipoipoga i le va o le tane, o le fafine ma le Atua.**

A e le o le va o le tane ma le tane, po o le va o le fafine ma le fafine. E lagolagoina e le susuga ia Polofesa Dr Otele Perelini FS lea mau, i se tasi o ana suesuega faatatau i faaipoipoga Kerisiano. O loo ia faailoa ai, e le o se faaipoipoga faaKerisiano ia faaipoipoga itupa tutusa.

(ii) **Mo le faatupuina pea o tagata.** O le faaipoipoga itupa tutusa, e leai se faatupuina o tagata aua e le fanafanau, e tusa ai ma le Pule Aoao a le Atua na ia tapuaaoina ai le foafoaga. E le mafai e le tuu faatasia o le tane ma le tane, le fafine ma le fafine, ona fanauina tagata. Aua o le nafa tausii lea o le tagata e pei ona faamanuia i ai le Atua, ina ia fanafanau ma ia uluola ma ia tumu ai le lalolagi. O le valaauina lava lea o le tagata e fai ma soa o le Atua i le faataunuuna o ana fuafuaga mamana mo lana foafoaga. O le nafa tausii e moomia ai le galulue vaavaalua o le tane ma le fafine i lona faataunuuna ma e le mafai ona faataunuuna i mafutaga itupa tutusa.

O loo manino lava i le Mataupu Silisili o le Faavae Faaleagaga o le tatou Ekalesia lo tatou talitonuga i le uiga moni o le faaipoipoga Kerisiano. O le faaipoipoga lea i le va o le tane ma le fafine ma le Atua mo le faamoemoe ina ia faatupuina tagata e tusa ai ma le finagalo o le Atua mo lana foafoaga. O le faavae lea ua aiaina i taumafaiga a i latou e lagolagoina faaipoipoga itupa tutusa e sosofa ma soloia e fa'aaoga ai nisi o mafaufauga faa mataupu silisili ma mau mai le Tusi Paia.

O le Tusi Paia ma Faaipoipoga Itupa Tutusa.

I le taumafai e tali fesili e faapei ona ta'ua i luga, o le a taumafai ai e aumai nisi o mau o faapena ona fa'aaogaina e i latou o lagolagoina faaipoipoga itupa tutusa e finauina ai le faatagaina faaletulafono ma faaEkalesia i nei ituaiga faaipoipoga.

1. Mau Muamua: E tatau ona faatagaina faaipoipoga itupa tutusa, ona o loo faatagaina i le Feagaiga Tuai isi ituaiga faaipoipoga.

E aofia i lea mau le faatagaina o ituaiga faaipoipoga i le vaitau o auga tama (Aperaamo, Isaako, ma

Iakopo) faapei ona molimauina i le Tusi o Kenese. I lea vaiata e faatagaina ai le tele o avā, ma le faaipoipo o le tuagane ma le tuafafine (Aperaamo ma Sara) po o se tamaita'i o lona aiga (Iakopo ma lona tausoga le afaine o Lapana le tuagane o lona tina). Na molimauina foi i le taimi o auga tupu, e pei o tupu o Tavita ma Solomona ma a la mau avā.

E moni le finauga o loo ta'ua nei ituaiga faaipoipoga i tala o le Feagaiga Tuai. A e a faitau manino i nei tala, e foliga mai o se taumafauga a tusitala o le Tusi Paia, e faailoa mai tafa lē lelei o nei ituaiga faaipoipoga, auā e alia'e mai ai faafitauli e tele. O le tele o avā ma faletama, e alia'e mai ai le femisa'i ma le fefulituaa'i. Mo se faataitaiga, i le aiga o Aperaamo ma ana avā o Sara ma Akara le fafine pologa, na maitauina ai le leaga o le loto o Sara ia Isamaeli le tama a Akara ma aioi ai ia Aperaamo ina ia tutuli ese Akara ma lana tama. E faapea foi i le aiga o Tavita ma ana avā e tele. Na alia'e mai ai ni fe'ese'esea'iga ma sauaga mataga (i le va o Tamara ma Amanono) ma na oo ai lava ina fasiotia e le tasi o ona atalii le isi (fasioti e Apisaloma lona uso o Amanono). E manino ai i nei faata'ita'iga, e lē tataua ona faatagaina nei ituaiga faaipoipoga, e pei o le tele o ava, tuagane ma le tuafafine, e pei ona ta'ua i luga.

E oo mai i le vaiata o le Feagaiga Fou, ua mautu le mau, o le faaipoipoga, e tataua lea i le va o le tane ma le tamaitai. E pei ona molimau i ai le Tusi i le Au Eperu 13:4, "*Ia faamamaluina le faaipoipoga e tagata uma, o le moega foi o le ulugaliū ia leai sona leaga, aua e faamasinoina e le Alii e faitaaga ma e mulilulua.*"

2. Mau lona lua: Tele Tulafono o le Feagaiga Tuai e le o toe faatauaina i aso nei. Aisea la tatou te taumafai ai pea e tauave tulafono e faatatau i faaipoipoga itupa tutusa?

O lenei finauga, e faasaga i le Tulafono e lua o loo i le Tusi o Levitiko (18:22 & 20:13). O nei tulafono e lua, o loo faailoa mai ai le finagalo o le Atua ina ia 'aia nei momoe le tane ma se isi tane, e faapei ona momoe ma se fafine, o lo la faasalaga o le oti. O le finauga a le au lagolago i faaipoipoga itupa tutusa, aisea tatou te saga opogi ai nei tulafono o le Feagaiga Tuai, a e le faaleaogaina e faapei o tulafono i mea'ai, o le peritomeina ma nisi o i le Feagaiga Fou?

O le mea e fia faailoa e i ai le eseese o tulafono. E i ai tulafono faaletapuaiga ma le soifua mama, aua le faamamaina pea o le tagata i lo la va feagai ai ma le Atua. A e i ai foi tulafono mo le soifuaga lautele e iloga ai le Eperu mai tagata o nuu ese. O tulafono la i mea'ai ma le peritomeina, o tulafono ia o le soifuaga lautele aua le faailoaina o tagatanuu Eperu. O tulafono ia, na suia ma le faatauaina i le vaiata o le Feagaiga Fou, ina ua tatala le avanoa mo tagata o nuuese i le Faaolataga.

A o tulafono ia e faapei ona ta'ua i le Tusi o Levitiko, e mo le soifua faamamaina, ma e moomia pea le tausisia ina ia faatumauina lo latou ola mama, aua e mama ma paia le Atua o tatou tapua'i ma auauna i ai. E oo mai lava i le vaiata o le Feagaiga Fou, o faamamaluina e le au aposetolo. E pei ona atagia i aoaga a le aposetolo o Paulo o i le Roma 1:26-28.

3. Mau lona tolu: O faaipoipoga itupa tutusa e le afaina ai se tagata ma le foafoaga. Aiseā la e faasaina ai?

O le tali o le fesili lea o atagia i lafoga a Pope Faranisisi. E tele le afaina o le foafoaga a le Atua i faaipoipoga itupa tutusa ma na ia ta'ua ai ia ituaiga faaipoipoga, o faaipoipoga e le tusa ai ma le natura o mea (unnatural marriages). E tusa ai ma le tala o le foafoaga a le Atua, na la faia ai le tagata e tusa ma Lona faatusa paia o le tane ma le fafine. Ua tele vaaiga faamataupu silisili ma faauigaina eseese o le avea ai o le tagata ma faatusa paia o le Atua. A o nei vaaiga e taga tasi lava i le tagata e toatasi (individual), a e faatuatuaana'i ai o le atoaga o le tagata i le vaai a le tala o le foafoaga, o i laua o le tane ma le fafine (dual). O lona uiga, e le atoa le faatusa o le Atua pe afai na o le tane (po o le tane ma le isi tane), e le atoa foi le faatusa o le Atua pe afai na o le fafine (po o le fafine ma le isi fafine), aua e le o atoa i ai itu e lua o le faatusa o le Atua.

O le tagata atoa (tane ma le fafine) lea na faamanuia i ai le Atua ma tuu i ai lo laua nafatausi, o le avea ma soa o le Atua e fa'auau lana foafoaga ina ia fanafanau ma ia uluola e faatumu ai le lalolagi. O le finagalo lea o le Atua e le ausia e le tagata pe afai a e manatu le tagata e faaiipoipo atu i lona lava itupa tutusa. E manino ai iinei le afaina o fuafuaga a le Atua ma lana foafoaga pe a faatagaina faaiipoipoga itupa tutusa.

O le le o gatasi foi o ia ituaiga faaiipoipoga ma le natura, o lea foi e atagia i a'oa'oga a le aposetolo o Paulo, o i le Roma 1: 26-28. O le mau a Paulo, o ia faiga, ua tuufaafegai ai e le tane ma le fafine, aga e tatau ma aga e le tatau, e tusa ma le faaiipoipoga.

4. Mau lona Fa: E le o ta'ua pe o upuleagaina e Iesu faaiipoipoga itupa tutusa. Aisea la tatou te upuleagaina ai nei ituaiga faaiipoipoga?

I le Feagaiga Fou, o loo manino lava a'oa'oga a Iesu i faaiipoipoga, e faapei ona faamauina i le Mataio 19:4-6 ma Mareko 10:6-9, na Ia fa'aaogaina ai mau mai Kenese 1:26-27 ma 2:24. O lona uiga, ua toe faamautuina e Iesu le malamalamaaga faaFeagaia Tuai, e faatatau i le finagalo o le Atua i faaiipoipoga; o le tuufaatasia lava lea o le tane ma le fafine. E manino ai i, o le faaiipoipoga tatau i lona finagalo, o le faaiipoipoga lea i le va o le tane ma le fafine, e o gatasi ma le finagalo foafoa o le Atua. O lona le ta'ua foi o faaiipoipoga itupa tutusa, e mafua ona e manatu le Alii, o le faaiipoipoga e faapei ona finagalo ai le Atua, e i le va o le tane ma le fafine, a e le o le va o le tane ma le tane po o le tamaitai ma le isi tamaitai.

Iloiloga o Mau.

I le iloiloga o nei mau, ua manino ai le malosi o mau o i le Tusi Paia, e le tatau ai ona taliaina faaiipoipoga e faia i le va o le tane ma le isi tane, po o le fafine ma le isi fafine. Ua le gata, o le solitulafono i luma o le Atua, a o ni faaiipoipoga foi e le tusa ai ma le natura o mea, pe faataunuu ai le nafatausi o le tagata faapei ona faia ai e le Atua, ina ia uluola ma faatumu ai le lalolagi. O le le avea lava lea ma faatusa paia o le Atua, faapei ona faia ai i la'ua o le tane ma le fafine.

Upu Faai'u

O lena ua folasia atu nisi o faamaumauga mai le tala faasolopito o lenei mataupu i le lalolagi, o le faavae faamataupu silisili a le tatou Ekalesia faapea mau mai le Afioga Paia a le Atua, o fesiligia e i latou o lagolagoina le faatagaina o faaiipoipoga itupa tutusa. Faatasi ai ma se iloiloga o nei mau, e fesoasoani i la tatou tali faaleEkalesia.

O le tatalo a lenei taumafaiga vaivai, ina ia aoga e faamaite ai se talanoaga ma faufau ai o tatou manatu, i le mataupu faatatau i faaiipoipoga itupa tutusa. Aua o lea ua manino, ua taliaina e le tele o malo ma ekalesia i atunuu i fafo. O le mea moni la, o lea foi ua oo mai i lo tatou lotoifale, a o le a sa tatou tali atu faaleEkalesia, i lea lu'itau? Ia manatua foi, lo tatou tiute faaleEkalesia, o le tetee atu i faiga le kerisiano ma alolofa atu i le lua te tuaoi, faapei o i latou o lagolagoina ma fia auai (faafafine ma faafatama), i faaiipoipoga itupa tutusa.

Faafetai ona o lenei avanoa e faia ai se Pepa e matimati ai se finagalo o le Matagaluega (ma le Ekalesia Aoao) i lenei mataupu taua ua alia'e mai lenei vaitau. E i ai le lagona vaivai e le o i lenei Pepa se atoaga, a e tau ia o se faamaite aua so outou finagalo. E faalagolago lava i le musumusuga a le Agaga Paia e fesoasoani mai e fa'aatoatoaina so tatou vaivai.

Saunia susuga Dr. Arthur Wulf FS,
Faifeau Faiaoga, Kolisi Faafaifeau Malua.

O LE PEROFETA MULIMULI

(O le tala faafagogo ua faaSamoaia mai le tusi, 'The Last Oracle', tusia e James Rollins)

7:05 taeao

Atumauga Urale i Saute

O le oso a'e o ulua'i ave o le la i luga a'e o atumauga o siosiomia ai i latou, na alo atu ai e Monike le vaalaaui i lana foe umi, ma o atu i le loloto o vaovao. Na taia le taumua o le vaa i se faaputuga palapala. Ua taunuu i se elele talu mai le umi o folau, e ui lava ina ua na o se lopala.

“Nonofo iinei,” na ia faatonu atu ai i tamaiti.

Na ia sa'eu solo lana foe e saili solo ai se pa'umatū e mafai ona ia savali atu ai. Ona ia oso lea i lalo mai le vaa, ma tago atu fesoasoani ia Piota ma Kisika e aumai i lalo ma faatutū i le mati'e o mutia lata ane. Na oso atu lava Konesetatino ia e pei o lana masani, a e na faaletonu lana tu laueleele. O lona vaivai na iloa i lona uli i lalo o ona mata ma lona gatete ina ua tu i luga. O Marata na feoloolo lana oso atu, i ona vae e lua ma tu lelei faapunou.

Na tālo atu Monike ina o atu i luma. Na lopala le auala ma vaivaia i le isi kuata maila, a e na faasolo ina a'e i luga le auala mai le vai ma malō le auala. Na tau atu i le vaomatua o laau uilo ma isi laau uumi. Na faasolo atu i le itu o vaovao, lanulauava o laufanua ma laau iti.

Na latou taunuu atu i le tumutumu o le a'ega, ma iloa atu le fola mai i o latou luma.

Pe tusa o le maila le mamao ese, na taatia mai ai pei o se togitogi, se aai e vaevaeina i se vai siliva e tafe solo ai, o loo i le malifa. Na iloilo lelei e Monike le nofoaga. E foliga mai ua leva ona tuufua ma lafoa'iina. Na fefiloi solo ai atufalega o fale laupapa ma fale maa i autafa o le auala pefu. Na i ai se vilivai tuaoi ma le alia. Na taatia ese lona uili ua gau ma taatia ai pei se alalaupapa i luga o le vai. E tele nisi fale ua toulu ma malepelepe, ma sosolo ai le vao i le nofoaga na tanumia ai i laau ma vao mafiafia.

“O se aai o galuega eli ua leva,” na faamatala atu e Konesetatino. Na tago ane le tama fofola le faafanua, e siaki lo latou tulaga. “E leai se tasi e nofo ai. E lē saogalemu.”

“Toe fia le mamao tatou taunuu i le nofoaga o le maina?” na fesili atu ai Monike.

Na fua e le tama lona lima matua i luga o le faafanua, ona ia faasino lea i se faaputuga o fale

faaleagaina. “Pe tusa o se afa maila i tala atu o le aai. E lē mamao.”

Na vaai atu Konesetatino i le itu taumataui o le aai. Na foliga tiga lana vaai. Na te le'i tau faia se tala. O tua atu o le autafa o le mauga, na taatia ma aliali mai ai se mafola lanulauava uliuli o vai, o sosolo atu e oo i le tafailagi.

O le Vai o Karakai.

Na siaki e Monike lana pine. O loo lanu mūmū pea. Peitau ina ia taunuu i le aai, e ao ona latou faasaga sa'o i le vaituloto, i le loloto o le ataata o kasa 'o'ona faaleitiō.

“O le ā le malosi o le vevela i lona nofoaga?” na fesili ai Monike a o lue atu lona ulu faasino i le aai.

Na toe taai e Konesetatino le faafanua ma tu i luga. “E lē tataui ona tatou faatali mo se tafaoga.” Na faataupupula Monike i le tama, ma lona loto fiafia i lona manatu faatauvaa toe fia mālie. Peitai e leai se isi o i laua na 'ata. Ui i lea, na lave atu e Monike lona lima i autafa o le tama a o la'ua savavali agai i luma. Na ia opo ma oomi mai Konesetatino, a e na ia tali atu foi i se ataata. O se vaaiga lē maua soo.

Na mulimuli atu Piota ma Kisika a e taotaotua atu ai Marata.

Ua latou sao mai le tele o faigata e oo mai nei.

E leai se toe foi i tua.

Pe tusa o le afa o le maila mamao ese, na vaai atu ai Porisakova i ana manu sa tuli o mou atu i le tuasivi. Na ia upuvale lē leoa i le tamaloa o loo ta'ita'iina tamaiti a o ia tootuli ifo i autafa o le vaalaaui na fa'aaoga e le isi ana vaega, ma se'i ane lana fana mai lona faamoega i lona tau'au. A e na te le'i fa'aaui, e tataui ona se'i fufulu muamua lana auupega. Ua tumu i palapala ma le vai, i le uma ai o lana feausiga ma asaga solo i lopala ma vaivai. Na ia tatala le fana ma siaki ona vaega taitasi: o le amoti, o le gutu ma le utupulu. Na ia faamamā ma faamago lelei vega uma. Ina ua manatu ua lelei, ona ia toe faapipii lea o vaega eseese o lana meataui. O le faagasologa masani o tapenaga faafitafita nei, na toe maua ai le toafilemu o lona mafaufau ma le to'a faata'ita'i. Na mae'a, ona ia tula'i lea i luga ma toe afisi lana auupega.

Ua leiloa lana leitō uaealesi, o Porisakova ua na o ia toatasi na sao mai le lavea o le latou vaalele sami. O le lima o le pailate na tipia e le ili. O le tasi fitafita na malepe lona ulu, ina ua taia i le pito o le vaa ina ua mafuli. O le isi na maua o tafetafea faasaga i lalo, ua oti i le malemo.

Na o Porisakova na totoe, e ui ina sa i ai se lavea umī i lona vae, sa loloto tau i le ponaivi. Na ia fa'aaogā le ofu o se tasi o ana fitafita ua maliu e saisai ai lona manu'a. Na te manaomia se togafitiga lelei ina ia lavea'iina le afaina ona o aafiaga o le palapala, ma i'u ina mutu ai o lona vae.

A e ao ona fai muamua lana galuega e tatau ona fai. E lē tatau ona ia toilalo; e lē faatagaina le faiaina. Na setusetu atu Porisakova ma lona vae tiga i le manu'a, e saili ana manu o tuli.

7 Setema, 8:11 taeao.
Piripaitu, Ukureni.

“Ala i luga!”

Na lagona atu e Karai le valaau, a e na taumafai lona mafaufau e faavasega. Na lagona le tiga i ona faalogona. Na faatumulia lona ulu i malamalama ona liua lea ma vaaiga faasuāvai.

Na punou atu Luka i ona luga ma luelue ona tauau. Na tale Karai ma tulei ese le tamaloa a o ia tu a'e i luga i lona tulilima. Na ia faataupupula faasolosolo i le potu. Na i ai o ia i se sela faasimā vali mūmū ua faasolo ina matafi ese. O se malamalama na sau mai le faamalama na loka e maualuga i le puipui. O lalo ifo o le faamalama na nofo ai Koualasaki i luga o se faamalū manifinifi, o lona ulu o loo tautau i le va o ona vae, o loo ōi i le faafaufau.

Na mānava tele i totonu Karai, faamalosi o ia e malolo, ma toe tomanatu i mea na tutupu. Na ia manatua le a'e malos i fafo ma le vanu a o faasilima, o se ti'eti'e puupuu i le elikopa, ona ave lea i se vaalele la'u uta i le maligi o timuga. Na ia tagotago atu i se lavea o lona ua. Na latou oo loa i totonu o le vaalele, ona faaonā lea o i latou.

Na lē iloa e Karai le nofoaga na ave i ai i latou. “Elisapeta...Rosau...?” na ia fesili atu ai i le leo oolo.

Na lūlū le ulu o Luka. Na ia faapa'ū atu i le puipui ma solofa ifo i lalo. “Ou te lē iloa po o fea i la'ua. Atonu o loo i se isi sela.”

“E te iloa o fea o tatou i ai nei?”

Na faamimigi Luka. O Koualasaki na oi.

Na tu a'e i luga Karai, faatalitali se'i uma le taavili o le lalolagi, ona laa atu lea i le faamalama. Sa fai sina maualuga na te lē au i ai.

Na ea a'e i luga Koualasaki, ma iloa atu le mea o vaai i ai Karai. “Piesa, 'aua e te fia mālie.”

“Tu i luga,” na faatonu atu ai Karai. “Fesoasoani mai ia te a'u.”

Na uu le manava o Koualasaki a e na tu lava i luga. Na uu lana moto oomi ona tama'ilima i le oono.

“O le a lou manatu ia te a'u? O sau apefa'i?”

“O apefai e laititi la latou faitio.”

Na laa atu Karai tu i luga o lima o le tamaloa, aapa atu i le itu i lalo o le faamalama, ma sosolo atu i ona puipui u'amea i le fesoasoani a Koualasaki. Na ia autilo atu i fafo i se laufanua uiga ese. O se aai, o le afa na ufitia e le vaomatua faasolo i tua. O le nofoaga e foliga malepelepe pei na tu'ia i ni pomu. O taualuga o fale na ufitia i limulimu pe masofasofa, o faamalama na ta'ei ma nuti, o faitotoa mo le ulufafo i faalavelave na ufitia i le elea, ma le vao ma laau sosolo i ta'eta'ei o sima.

I le isi itu o le auala, sa tu ai se laupapa tuai o faasalalau ai ni faafiafiaga o tafaoga, o se uili Ferisi ma ni tietiega ma taupega. O le pito mai i luma, o i ai se aiga o aga'i atu i faafiafiaga.

I le isi itu o le aai, na iloa atu ai e Karai le uili Ferisi lava lea e tasi mai le laupapa o tu matilatila i le vanimonimo taalaelae. O se vaaiga nofotoatasi o se mamalu sa i ai muamua. Na lagona e Karai le mamafa o ona vae i lona vaai atu i lea vaaiga. Na ia iloa le mea o loo latou i ai. O le nofoaga tuufua o taupega ma faaluega ua ave ma faailoga o le tulaga o i ai le aai atoa.

“O Kerenopila,” na ia tomumu ai ma toe faapa'ū ifo i le fola.

A e aiseā ua aumaia ai i latou iinei?

Na toe manatua e Karai le lipoti a le fomai su'esu'e i le tino o Poleki. O vaega o kasa faavevela na maua na iloa ai o le polofesa sa faaonā atu iinei. E ui ina o suesuega mulimuli ane a Fomai Malakoma Teni na faanenefuina ai.

O le a le mea lea e tupu?

I le isi sefulu minute, na su'esu'e ai e Karai le sela atoa ma tofotofa le faitotoa. E ui ina sa elea,

a e sa mausalī. Na lagona atu e Karai se tagata o loo i fafo: o le pa'ō o lana savali, o se taletale lemū. E pei lava o se leoleo faitotoa. Atonu sa ia faalogo mai o latou talanoa ona ia valaau lea i ona ta'ita'i, auā e le'i umi lava a e lagona atu le patapatatū mai o seevae agai i le faitotoa.

E toatele nauā mo se osofaiga faafuase'i.

Na sitepu i tua Karai a o tatala mai le faitotoa. O fitafita ofu uliuli ma enaena faatasi ma latou fana sa faasino mai, na latou fetaomi mai i totonu o le potu. Na latou faia se avanoa e savali mai ai se tamaloa umī na laa mai i luma, tu i le auala. O ona foliga e lē pei o le tamā o loo i ai i le ata i luga o le laupapa o faaaliga o i fafo. O ona foliga ua na o tulimanu ma pi'oga malō; o lana soesā na sele faagatasi na mataina ai lona auvae. O lona laei o le suti lanu moana vaivai ma le fusiua silica mūmū, na su'i faafetaui lelei ma lona fuatino. E oo lava i lalo o ona –

“Manaia ou se'evae,” na fai atu ai Koualasaki.

Na tilotilo ifo le tamaloa i ona seevae uliuli polesi iila ma ataata i le vave ona faaleo mai o le manaia o ana teuga.

“Ia, e manaia mo'i a,” na fai atu ai Koualasaki i se iuleo tau punipuni ai.

Na liliu atu le vaai a le tagata ia Karai. “Topelei uturo, Taitai Piesa. Sau ta o, e i ai se feau ta te fia talanoa ai, a e lē lava se taimi.”

Na nofo pea Karai i le mea sa i ai. “Ou te lē alu atu, se'iloga e ta'u mai le mea o i ai tamaitai e toalua–

Na talo atu le lima e faate'a ese. “O Elipatesa Poleki ma Fomai Sei Rosauo. O loo saogalemu uma la'ua, ou te ta'utino atu. O le upu moni, o lo la apitaga e sili atu le lelei. A e na laitiiti le taimi na matou tapenaina ai. Faamolemole maliu mai le itu lea.”

O fitafita e toaono sa i ai fana na aveesea le fa'aaloalo o le valaaulia. A o taitai atu ia i fafo, na ia iloilo solo i lona siosiomaga. Na laina ai sela i itu e lua, e manino mai o se falepuipui ua lafoa'i. Na iloa atu i nisi o faitotoa matala, nisi o vai tutu, o moega elea sa fefulisa'i, ma faulaiga otaota o faaputu solo i tulimanu. E sili atu ai le saogalemu o lo latou sela pe a faatusatusa.

Na tau atu le auala ma gata i se potu o leoleo. Na iloa atu ai se vaaiga o se lotoā falepuipui ua matuā vaoa. O le mamao atu, i le tafālagi, na iloa atu ai e Karai tumutumu maualuluga o alaasu o atufalega e faailoga ai afi ma masini o Kerenopili.

O le latalata mai, na 'o'ī mai ai se nofoa i se leo taufaafefe.

Na liliu atu Karai. O se laulau sa taatia i le ogatotonu o le potu. Sa nofo ai Matesone i ona tua, o faasasa'o i lona nofoa, o laei foi i ona ofu papa'e, foliga maloloina ma to'afilemu. Na onosai Karai mai le lagona o le fia oso atu ma mimilo gau le ua o le tamaloa. Peitai sa ia manaomia ni tali, ma o lona usitai ma lagolago atu o le auala sili lea e maua ai tali.

Na faamalosia o ia e nofo i se nofoa i le isi itu o le laulau, ona ia nofo lea i lalo. Na faasino atu pea le gutu o se fana i lona tuāua.

Na i ai se isi tagata ese na faatali atu i le potu. O le tamaitai sa tu i tua o le laulau. O lona lauulu uliuli sa fai ma faafeao o lona foliga, na malō aunoa se gaiōi. Sa laei foi lona suti pa'epa'e, o se toniga tutusa lelei ma laei o le tamaloa na taitaiina mai Karai i totonu. Na laa atu le tagata ese ma nofo i lalo, aunoa se ano ane ia Matesone peisea'i e lē o i ai.

Na piilima le tamaloa i luga o le laulau. “O lo'u igoa o Senatoa Nikolao Solokova. Atonu ua e faalogo muamua ia te a'u.”

Sa le'i fai atu Karai se upu, na mafua ai ona faapi'o le gutu o le tamaloa i le inoino.

“E leai? Ia, o le a suia lena tulaga,” na fai atu ai le tamaloa. Na ia tālo atu i le fafine pae'e. Na laa atu o ia ia Karai, i se savali faamalō. Na ia punou ifo i lalo i se tasi o ona tulivae, faasipa i luga lona ulu, ma tago atu i le lima o Karai. A e na te le'i pa'i atu i ai, na ia faaemo atu ona laumata, e peisea'i o faanoi atu.

Na faamimigi tauau o Karai. Na tago malie atu le fafine sii i luga le lima o Karai ma faataoto i luga o lona alofilima na ia faataatia atu i lalo. O le tumutumu o ona tamatamailima na eneene atu le pito i lalo o lona lima. Na faataupupula atu ona mata i mata o Karai.

“Ua uma ona matou talanoa ma Elisapeta Poleki,” o Nikolao lea.

“Na logo mai e le afafine o Fomai Poleki mea na outou maua i Initia. E maoa'e le matagofie. O le faamatalaga lava lena e tasi, ua lava na te aumaia outou uma iinei. E maoa'e le manaia ina ua iloa o lo tatou tupuaga e talatala atu seia oo i Eleni o anamua, tau i le Perofeta o Telefaia ta'uta'ua.”

Na faaleleia e Karai lona fa'a'ī. “Le tatou tupuaga?”

Na faasino atu le tamaloa i le fafine. “E faapena

foi ma Elena. Tatou te o mai uma i le laina o kenera ma le toto e tasi.”

Na manatua e Karai le faamatalaga a Luka. “Mai le Kipisi na leiloa.”

“Ioe. Na faailoa mai e Fomai Matesone ia te au e faapea na logo atu oe faasino i le tulaga lē manuia a e talafeagai, o le avega o tamaiti na. O le upu moni, o lo’u tamā le isi o na tamaiti Kipisi. Ma ou te talitonu ua e feiloai i se isi o lo tatou aiga potopoto. O Sasa laitiiti. O se teine o i ai taleni faapitoa.”

Na iloa e Karai le tagata o loo faasino i ai le tala a le tamaloa, a e le’i suia ai ona foliga, na tumau pea pei na te lē iloa se mea.

Na faasaga atu Elena ia Nikolao ma tautala atu i ai faaRusia. Na lue le ulu o le senatoa. “O lona uiga ua lua feiloai ma Sasa. Faamolemole aua le maimaua lou taimi e te pepelo ai.” Na ia geno faasino atu i le fafine o loo i ona vae. “O Elena e fai lava – ia, si ona malamalama, fai atu ai. O lana pa’i e fai sina ma’ale’ale, e fua ai le vevela o le pa’u o lou tino, le manavanava ma lona tātā. Ua fesootai foi o ia ma ki i totonu o ou i’oimata ma lau mānava. E leai se mea e tasi e sao mai ia te ia. O ia o la’u mea faalogo ma la’u mea vaai faapitoa.”

Na faasino a’e Nikolao i lona taliga. Na faliu Elena, ma tago atu le isi ona lima, ua vavae ese ai lona lauulu i tua o lona taliga. Na iloa atu e Karai se faapi’o foliga tutusa, o se uamea o taotoga. O le taotoga o totoga e pei lava ona i ai i le teineitiiti. O le fafine lenei, o le faatusa tagata matua o Sasa, a e eseese a laua taleni savana.

“E maoa’e lava o ia,” na gogolo atu ai Nikolao, o ana upu e mafana le mitamita, a e na faailoilo mai ai se isi mea e uliuli sa i lalo ifo. Na iloilo e Karai le tamaloa, ma na iloa se mea na misi. “A o fea la o i ai lou totoga faapipii?”

Na faapuiti mata o Nikolao ia Karai, ma na iloa lelei e Karai le emo o le mataita i ona foliga, e manino o se mea na oona. Na salu atu e te tamaloa lona lima i lauulu sa i luga o lona taliga i se gaioiga fai ma le to’amalie. “O auala na ou te le’i ui ai, faamalie atu ai.” Na taumafai le mafaufau o Karai e tuliloa le uiga o lea tala. Afai sa le’i faia se taotoga o Nikolao e faapipii ai sona totoga, o lona uiga sa fanau mai e aunoa ma se taleni savana. A o lea lava sa tuu o ia e se tagata, i se tofiga maualuga ma tele le paoa i totonu o Rusia. Aisea? O le a le i’uga o le taaloga lea e faia iinei?

Na fa’auau pea Nikolao. “Tatou toe foi i tua ia Sasa. Mai le tele o fevesiaiga o loo tutupu i Uosigitone, o loo matou fetai ai ma faafitauli e manino ai po o fea tonu o i ai o ia. O le mafuaaga autū lena na aumai ai outou mai Initia.”

Faafetaia’i ma le fana ia oti i le nofoaga tonu e pei o Api Panetee.

“O lo matou atugaluga ma le popolega o le saogalemu o Sasa ma lo matou mana’o e toe faafoi mai o ia. O le mea muamua lava la, matou te fia iloa po o fea tonu o i ai o ia, a e o ai foi o loo taofia o ia.”

Na faatau pupula sa’o Karai ia Nikolao. “Ou te lē iloa.”

I lona itu, sa lūlū mai ai le ulu o Elena.

“E te mana’o e toe taumafai faalua? O lea ou te taumafai e taofiofi faasivili le mea lenei. A o lea ia te i matou le toafa o au uo iinei.”

“E lē mafai ona ou fai atu mautinoa,” na tali atu ai Karai. “O le taimi mulimuli na ou vaaia ai o ia sa tausia e la matou faalapotopotoga.”

Na tepa atu Nikolao ia Elena, ma sa ia lue mai. O le sa’o lea na fai atu ai Karai.

“Ma ou te manatu la tou te lē o galulue mo Ioane Mapeletope, talu ai o lona faalata sa taumafai e fasioti outou ma Fomai Matesone i le faletalimalo i Agara.”

“Leai, o loo matou tau ina ia aveese mai le teineitiiti mai ia te ia.”

“Manaia. O le tamaloa lena e matua’i mamao ma le faatuatuaina. O lona uiga la e mafai ona tatou fetuutuuna’i. Aemaise o lea ua iloa nei e i ai se mea tāua e mafai ona tatou fefaatauai.”

“Muamua, o le a le mea tou te mananao ai i le teine? I le a le i’uga?”

Na faatau pupula Nikolao ia Karai, o iloilo ia te ia i ona mata sauā. Na maitauina e Karai se loloto o mailei ma togafiti, faatasi ma auala palapalā, o se tasi o saili i lona faalauiloaina, e faaleleia ai lona lē agavaa i isi itu.

Na tuliloa e Karai le vaivaiga lena. “O i ai sau fuafuaga mamao i tua atu o le soona fa’aaogā faasauaga o tamaiti e pei o Sasa?”

Na feemo pupula ona mata. “Aua e te manatu faatauva i le lautele o lo matou sogasogā. Pe valivali i matou i na ituaiga tuuaiga matuiā. E leai ma ni mea faapena, a e na o faamoemoega lelei mo le manuia o tagata o loo i o matou mafaufau, ina ia faaleleia le lalolagi uma...”

(e faia pea...)

MAA FAVAE FALE TINA

“Afai e le atiina a’e e le Alii le fale, e galulue fua i latou o e atiina a’e...” Sala. 127.

O fatuga ia a le fai salamo e masani ona saafi ai le tagata faatuatua, i soo se galuega ma faamoemoe tetele e fia fai. Lea foi na ‘au’au i ai le saunoaga a le ta’ita’i o le sauniga, le afioga i le Taitaifono o le Fono Tele, susuga Tunumoso Soliola Iosia FT, i le sauniga lotu faapitoa e tuuina ifo ai le Maa Faavae o le Fale Tele o Tina o loo fausia i Papauta, i le Aso Lua 17 Setema 2024. O le sauniga na molimauina e le toatele o Toeaina ma Faletua, sui o Komiti o le Ekalesia aemaise o le Laulau a Fono a le Mafutaga Tina ma le Mafutaga Faletua Toeaina, ma le toatele o faletua o Toeaina, o Faafegaiga ma A’oa’o e oo lava i faletua o Tiakono ma le lautele o le Ekalesia. Na faamamafa e le susuga i le ta’ita’i o le sauniga, le feau ina ia lagona le lotu maulalo e maua ai le faafetai i le Atua, ona o le fa’aogaina o le soifua mo ana feau.

O se vaega o le sauniga na tuuina ifo ai fagu uga tetele, o i ai totonu lisi o suafa o sui uma o le Mafutaga Tina mai le nofo a Matagaluega, o tofu sao ma togi maa, o feagai tonu ma lea galuega i lenei vaitau. O loo tanumia faatasi ai nei faguuga ma le Maa Faavae o le maota. O le tatalo ma le faamoemoe i le Atua, se aso ma se tausaga o i luma e tusa ma lona finagalo, a e toe ‘eli a’e nei maa, ona silafia lea e auga tupulaga o le Ekalesia i lena vaitau, i latou na sailimalo ma tautua i le Atua e ala i lenei galuega. A ia fai mo le viiga o le Atua, ‘aua ne’i ia te i tatou!

Na saunoa le afioga i le Taitaifono o le Mafutaga Tina, faletua ia Taulogomai P. Gray, e faafetaia le afioga i le ta’ita’i o le sauniga mo le Upu faala’ei’au aemaise le faapa’iaina o le Maa Faavae. Na ia ta’ua foi ma le agaga faafetai le auai ma le sao taua o le afioga i le Pule o le Konekarate e fausia le maota, afioga Tuiaopo Andrew Ah Liki, faapea le afioga Asiata Van Wright o le Inisinia, ma le Komesina o Fanua a le EFKS, susuga Loia E. Kolia FS o le tusiata. A e le faagaloina lava le tapuaiga a Tama o le Ekalesia, faapea le nofo tapua’i o le Ekalesia Aoa, a o alo faiva Tina mo lenei maota, ua fuafua o le a tapuvae tasi i ai faamoemoe e eseese pe a mae’a lona fausaga. Malo! E au le inailau a Tina!

F. Tolua

FAAILOGA LE 180 MALUA

O le 2024 lenei e atoa i ai le 180 tausaga talu ona faatuina le Kolisi Faafaifeau Malua i le 1844. Na faailoga ma faamanatu lenei aso taua i se sauniga faapitoa na saunia lava e le Kolisi i le Aso Lua 24 Setema i le Fale o Tina i le Laumua. O le susuga i le Faifeau Pule o le Kolisi, susuga Polofesa Dr. Vaitusi Nofoaiga FS na ia ta’ita’i le sauniga, o le taulaga faafetai ma le viiga i le Atua i Lana ta’ita’iga i lenei 180 tausaga. Na ia saunoa i se tala ootoo o le malaga umi ma le faigata, o le auaunaga a Malua i le a’otauina o le afaigaluega faifeau ma faletua, mo le galuega o le Tala Lelei i Samoa ma le lalolagi aoao. Na saunia foi le Keke o le 180 tausaga e faailoga ai lea aso faapitoa o le Kolisi. O loo molimau le tala faasolopito i suiga tetele ma le matagofie, o le alualu i luma ma siitia maua, o tulaga eseese faaleKolisi Faafaifeau, ona o le sailimalo o susuga i Faifeau Pule ma Faia’oga tuufaasolo mai, aemaise le tapuaiga lagolagosua a le Ekalesia Aoa. O faailoga ua mafai ona ausia i le Kolisi i le taimi nei: Diploma of Theology, Bachelor of Theology, Bachelor of Divinity With Honors, ma le Master of Theology. Ua a’oa’oina foi Faletua i mataupu tau Tusi Paia.

O le faailogaina o lona senetenari (100 tausaga)sa faia i le 1944. O le aso 8 Aokuso le lotu na ta’ita’i e E.J. Edwards; e tele lauga o lea aso, aofia ai lauga a Malietoa Tanumafili II, H. W. Whyte MA (Taitaifono Fono Tele) ma Elisara FT (Sui Taitaifono). Soso’o ma le tatalaina o le Fale Senetenari, e le Kovana o Samoa, Mr. Turnbull. O loo tusia faapea, *‘O le fale pito sili lenei i Samoa—i lona tele, ma lona malosi, ma lona manaia foi.’ Sa amata le manatu i Faia’oga Malua lava. O le fia faia o se mea e fai ma faailoga e faamanatu ai le Senetenari o Malua. Ua lotu gatasi ma A’oa’o o le a faia se fale. Ua faaputuina le tupe e oo i le £700. Ua logo atu i Komiti o le Ekalesia, ma ua finagalo i ai. Na filifilia le Tofā a Moe ma le aiga Salemalama i Saanapu latou te faia le fale. Na malaga i ai Faia’oga ma ua talia lelei. Ua feagai tonu foi ma le i ai i Malua o le A’oa’o Tufuga poto o Tavita Roma, o ia sa ta’ita’ina le itu tele o le galuega tau sima.’ (Sulu Samoa Setema 1944).*

O le faailogaina o le 150 tausaga na faia i le 1994, a o avea le susuga Oka Fauolo FT ma pule. Ia manuia lou 180 tausaga le Kolisi pele. **F. Tolua**

O LAU AFIOGA O LE SULU I AAO

O FAITOTO'AMATALA

“12 Na toina mai foi ia te a’u se faitotoa e le Alii.” 2 Kori 2.

Na ta’ua e se tasi tusitala e faapea: “O tagata e a’oa’oina le avea e fai ma tagata fai pisinisi latou te fai mai o latou e maoa’e le atamai i le mea e ta’u o le “mata’alia i avanoa.” Latou te vaai i tualumaga e pei o isi foi tagata, peitai latou te “iloa, e aunoa ma se sailiga, o avanoa na sopoloa i le vaai.” O i latou e “mataala, faatalitali, sauniuni i taimi uma e opogi ma talia se mea e oso a’e.” O Paulo le tagata e faapena. O lana molimau e pei o le 2 Korinito 2: “12 Na ou alu atu foi i Teroa ona o le tala lelei ia Iesu Keriso, na toina mai foi ia te au se faitotoa e le Alii.” E ta’u mai ai sa ia ola ma amio ‘mataala mo avanoa faalelagi’. O se ituaiga amio ma le ituaiga olaga e mafai foi ona tatou maua. Mo le aposetolo, o le savalia o faitotoa e tatala mai e le Atua e masani ona taunuu atu i faigatā. A e masani foi ona taunuu atu i faamanuiaga ina ua manumalo i mea silisili. O faitoto’a matala e lē aumaia ni seti o faatonuga maoti i mea tonu e fai faapea foi ma le taunuuga tonu e oo i ai. E ao ona e ulufale atu i le faitotoa, ma savali aga’i i totonu ma ona tala atu, e te silafia tonu ai ma fetaia’i ai ma mea o i ai. Pe mata o le a e lagona le fefe? Ioe, soo se taimi e te taumafaia ai se mea e le’i tagofia, e lei ausia ma e le’i faata’ita’ia muamua, o le a e maua i le lagona o le fefe po o le popole foi. Ma o taimi na e te faamanatu ai ia te oe, o a lava mea o loo faatali mai i lena itu o le faitotoa, o loo i ai faatasi foi ma lou Atua. Auā e le’i soona tatala atu e Ia le faitoto’a, ona tuulafoa’i lea o oe e te alu toatasi aunoa ma lana taitaiga.

E i ai nisi o aiaiga e masani ona aumai e le Atua, faatasi ma faitotoa matala, e ao ona manatua:

Muamua, o faitotoa matala e lē faasino i se nofoaga fou, se nofoaga mamao, po o se nofoaga ese mai le mea sa masani ai; a o lona uiga, o le iloa tino o se avanoa ma lu’itau sa le’i mafauina muamua, i se nofoaga tuai ua masani ai. O ni avanoa ma lu’itau e fou, o loo maua lava i totonu o lou aiga ma lou nuu, o totonu o lau aulotu ma lau ekalesia, ua faapupula i ai ou mata e le Atua.

O lona lua, o faitotoa matala e lē aumaia mo le manuia faapito na o le tagata e faailoa mai i ai. A o faitotoa uma ma soo se avanoa, o le faamoemoe maualuga ia manuia ai isi tagata. “*Ua fetalai mai le Alii ia Aperamo, ‘Ia tuua e oe o lou nuu, ma tagata o lou nuu, ma le aiga o lou tamā, a e alu atu i se nuu ou te faasino atu ai ia te oe...e manuia foi ia te oe o aiga uma o le lalolagi.’*” Kene.12. Na amata mai lava i le amataga ia Aperamo e oo mai nei lava, e leai se faitotoa e matala fua mo se toatasi, a e mo le toatele ma tagata uma. Ua tatala atu e le Atua se faitotoa mo oe? Afai o lea, ‘aia e te faatali, pe faalotolotolua; ia savali atu loa i ai ma le faatuatua.

O LE MALA O LE PONAKALAVE

“Ou te lē tu’u i o’u luma (o o’u mata) se mea leaga..” Sala.101:3a.

O le Ponakalave (pornography) - o ata ma tala matagā faaosofia ai le faitaaga, i luga o upega tafailagi ma agafesoota’i), ua sosolo fa’aafi mumū i le lalolagi atoa, ma ua toatele aiga ua susunuina ai, ua vaevaeina ma malepelepe ai mafutaga. E toatele Kerisiano to’aaga i lotu ua afaina ai, ua faapologaina ai ma o loo tauivi ina ia sa’oloto mai lena mala; ua latou lagona ua saisaitia mau ai i latou, ua tuulafoa’iina peisea’i ua leai se faamoemoe e toe lavea’iina mai ai.

O se tasi su’esu’ega i totonu o Malo Tuufaatasi (UK) na faailoa ai e 75% o alii kerisiano ma le 35% o tamaitai kerisiano e fai ma a latou amio ma masani le matamata i ata matagā. Pe afai e te vaavaai ma matamata ai i nei ata, e i ai nisi o neura malolosi o lou fai’ai, e pei o le topamine (dopamine) latou te faasalalau, feavea’i solo ma lafo atu vaaiga o ou mata, ina ia aafia ma faaosofia ai lagona o musele o lou tino, ma avea ai ma sootaga vavalalata malolosi i lou loto ma lou tagata atoa.

O le mau a le alii fomai o le mafaufau, Dr. Tim Jennings, “Soo se ituaiga o amio/masani faifaipea, na te fausia ala faaneura i o tatou fai’ai, o le a osofa’i i se faasologa e otometi (‘Any type of repetitive behaviour will create trails [neural pathways] in our brain that are going to fire on an automatic sequence’). O nisi aulotu ma ekalesia

latou te togafitia lenei ma'i i se tulaga e faamamafa ai le ola faaleagaga, i le amio tatau ma le kerisiano; ma ua avea ma ala ua lē silafia ai, o se ma'i ma se faafitauli faalemafaufau foi lenei. E fautuaina mo se togafiti o lenei gasegase, ina ia faamalolosi ma taumafai atili, ia tatalo soo ma alofa pea i le Alii. O se tulaga tāua lena. Peita'i, afai e te tau faasaga i le tino i le malosi ma le paoa o le tino, e te i'u ane ua e toe tau lava oe faasaga ia te oe.

O le a se tali? E tatau ona faafou lou mafaufau, ma e faia i se auala faasolosolo lelei. Pe afai sa sesē le a'oa'oina o lou mafaufau, e tatau ona toe fausia i le auala sa'o. Ma e manaomia le tuu atoa i ai o lou taumafai, e pei o le matua'i aveese atoa o le ponakalave mai lou olaga. O nisi taimi e mana'omia le i ai o sau uo kerisiano lua te mafuta e te saili fesoasoani i ai pe a tofotofoina oe. O lona uiga o le toe faapolokalameina atoa o lou mafaufau e ala i le fafagaina i afioga paia a le Atua. Fai mai le aposetolo ia Roma *"12 O lenei, le au uso e, ou te aioi atu ia te outou, ona o le alofa mutimuti vale o le Atua, ia outou tuuina atu outou tino i le Atua, o le taulaga ola, ma le paia, ma le mālie, o le mea lea e tatau ai ona outou faia. 2 'Aua foi tou te amio faatasi ma lenei lalolagi, a e peitai ia liliuina i le toe fuataiina o outou loto, ina ia outou su'esu'e pe se a le finagalo o le Atua, o mea ua lelei, ma le mālie, ma le atoatoa."* E mafai ona e saoloto mai le faapologaina o oe mai le saisaitiaga a le ponakalave. E mafai e lo tatou Alii o Iesu Keriso ona faasaoloto i tatou, i le mana o lona alofa.

Ua avea le faigofie ona maua o auala o fesoataiga faaonaponei (telefoni ma komepiuta), ua lamatia ai le olaga faakerisiano i lenei faatupu mala o le ponakalave. E sili ona mata'utia le lamatia ai o fanau lalovaoga, faapea tupulaga talavou ua afua ai ona pologa i nisi faafitauli ogaoga o le olaga. E amata mai le vaai o mata. E ao ai ona fai e pei o la le faisalamo, *"Ou te lē tu'u i o'u luma (o o'u mata) se mea leaga."* Sala.101:3a. Ia faamalosi ma finau e tete'e faaosoosoga o le fia vaai/matamata i vaaiga leaga. E moe'i'ini mata ma tatalo i le Atua e foai mai le malosi. E fofola le Tusi Paia ma taula'i i ai lau vaai, e te maua le loto tele i soo se fuaitau e faasino atu e le Agaga Paia i lena lava taimi. E te amata, ona fesoasoani lea o le Atua i lou filiga, e fa'aaau seia oo ina e manumalo, ma viia ai o Ia.

F. Tolua

OSIGA FEAGAIGA, **EFKS MUSUMUSU**

O le taeao o le Aso Faraile, 27 Setema 2024 sa faataunuaina ai le osiga feagaiga a le EFKS Musumusua ma Salimu, Pulega Fagaloa ma lo latou faifeau le susuga Nuufaigata Peleiupu Mulipola FS ma le faletua ia Laalaai. Sa faatumulia lea taeao i le paia o le nofo a Pulega, Matagaluega faapea foi aiga ma uo a le faafeagaiga ma le faletua, faapea Samoa ua potopoto. O le Toeaina lava o le Pulega Fagaloa, le Taitaifono Komiti Au Toeaina, susuga Asotasi Gu Time FT na ta'ita'iina le sauniga. O le faitauina o le Tusi Paia na feagai ma le susuga Ieti Tofaeono FS. O lauga o lea aso sa saunia e susuga Siasia Samoa FS mo le faifeau ma le faletua, a o Filiilagi Toleafoa sa saunia se upu auā le Ekalesia, ma faaopoopo atu foi i ai le Toeaina auā le galuega tau amata.

Na fai ma sui o le Ekalesia le susuga i le A'oa'o Fesoasoani o Fuatele Tanielu AF e fa'aalia lo latou filifiliina o le susuga i le faifeau i le aso 3 Mati 2024, ma amata ai feutanaiga; o le aso 31 Mati le aamiga, e pei ona i ai le asō. Na saunoa foi le faifeau i lo la'ua talia ma le fiafia o le valaau atu a le Ekalesia. E 2 le o le Feagaiga. Na faai'uina i le Sakarameta o le Faamanatuga na taitaiina e le susuga Nuufaigata. O susuga lava ia Asotasi Gu Time FT, Tafa'i Galumalemana FT, Faasavala Leilua FT, afioga Tiakono Toeaina Apia Sasa'e, Atiifale Mau'u Siasia TT, faapea le Tiakono Toeaina Faasaleleaga, afioga Tuatō Iele TT, o a'oa'o ma le au matutua o le Ekalesia sa fai ma sui e faafeiloai aloaia le faifeau ma le faletua.

O le susuga Nuufaigata e mai le afioaga o Siutu i Salafai; a o le faletua e mai Solosolo, Samauga ma Lefagaoalii. O le tausaga 2017 na ulufale ai i Malua ma faai'uina le taumafai i le 2020. O le 2021 na galue ai faafaiaoga i le Kolisi Papauta, a o le 2023 na faauuina ai i le tofi Faifeau Samoa. E toatasi lo la alo le tamaitai o Anniversary. Na tauluga lea aso i fa'aaloaloga masani ai i aso tetele faapenei, ma taape ai ma le fiafia ina ua faasopolia le mamalu sa auai i le mauu o le Ekalesia ma le paia o aiganalua. Ia faamanuia le Atua i le susuga le Faafeagaiga ma le Faletua; ia faapeaina foi i le paia o le Ekalesia.

Saunia susuga Tapuni Maulolo FS,
Failautusi Pulega Fagaloa.

E TOE FAAMANATU ATU!

Ua molimauiina le tele o tagata lotu ua maliliu, e tusa ma le Lisi e tolaulauina i le Fono Tele o tausaga taitasi. Peitai, e leai ni tala e molimauiina ai lo latou soifua faatuatua ma le ola tautua ia Keriso. O le mea lea, i le ava ma le migao tele e faamanatu atu ai faamolemole i le aufaigaluega Faifeau, ina ia tauaoina mai Tala o e ua maliliu, mo le faamauiina ina ia silafia ai e le Ekalesia aoao. O se tasi leni o vaega taua ma aoga na faavaeina ai leni Nusipepa a le Ekalesia. A o leni foi le tasi tiute o le galuega faafaifeau e tusa ona finagalo ai susuga i Toeaina. I se isi itu, o se tali atu foi lea ma le alofa moni i nai tagata lotu sa tautua i le Ekalesia a o soifua. Mo le aufaigaluega e maliliu o loo galulue, e talosaga atu ma le fa'aaloalo i susuga Failautusi o Pulega, pe a tusa ma outou finagalo, mo le saunia o Tala o Maliu o susuga Toeaina ma Faifeau & Faletua. Faia ma le fa'aaloalo tele. O la outou auauna ia Keriso. **Faatonu Sulu Samoa.**

PI'ILUA LE TALALELEI & ASO SA TAMA I NISI ITU

E tusa ona masani ai, o le masina leni o Setema i lona ulua'i Aso Sa na faamanatu ai e Aulotu uma o le EFKS, le 194 tausaga o le Tala Lelei i Samoa, talu ona tu 'a'ao misionare L.M.S. i Mataniufeagaimaleata Sapapalii i le aso 24 Aokuso 1830. E le gata i Samoa, a e faapea foi i Aulotu EFKS uma i atunuu ma Matagaluega i fafo. Mo Niu Sila, Ausetalia ma Fiti, sa le gata ina faamamalu lea taeao taua o le Ekalesia, a e sa faapea foi ona fuifuilua ma le faamamaluina ai o le Aso Sa Tama i ia atunuu. Mo Samoa, o le Aso Sa lona lua o Aokuso e faailoga ai le Aso Sa Tama, a o Amerika ma Hawaii, o le Aso Sa lona tolu o Iuni. Malo le faamamalu o le Aso Sa Tala Lelei, aemaise o au faiga taulaga mo lea taeao.

FAASA'OGA FAAMOLEMOLE!

O le Tala i le Osiga Feagaiga a le EFKS Lepea ma le susuga Fiso Lakisa AM & Felicity, o lomina i le Sulu Samoa Aokuso 2024 (itulau 4), o loo ta'ua ai nuu o le faifeau, o Lano ma Poutasi a o le faletua i Saanapu ma Sapapalii. E fia faasa'o atu lea tala e faapea, o afioaga o le susuga i le Faifeau o Sapunaoa, Salani ma Poutasi i Falealili; a o le faletua o le isi ona afioaga o Vaiala i le Vaimauga. E asuasua ai vai malu i puega i finagalo ua afaina ma manu'a i leni lape o faamauga, ma tatalo ina ia faamagalo le auaunaga a le Sulu Samoa. Tau ina ia alofa le Atua faamanuia le galuega ua valaauina i ai lupe faalelele a aiga, afioaga ma le Ekalesia, ia manuia foi le afioaga o le Tupufia tainane le Pulega ma le Matagaluega i Faleata.

F. Tolua



O lisi o suafa Mafutaga Tina, ma Fagu uga o teu ai, o tanumia i le Maa Faavae Fale Tina.